

OSUDA PUSTA FENIKSA

OŠ „Srdoči“(2013.)

Dobar dan sen, judi dragi!

Ponovo smo se našli da bimo malo počakulali,
najnoveju osudu, ov put Pustu Feniksu pročitali
i se ča god (i kega god) još usput ošpotali!

I ovo se j' leto čuda lepega dogodilo,
još više bedastoć i škerci pul seh nas bilo
a bome se je fanj tega od lane i promenilo!

Pa da pak najzad i rečemo
zač ovega brižnića danaska rastežemo,
da pobrojimo ke se nekoristi storil je
i da najzad si skupa povedemo
zač leta Gospodnjega 2013. Pust Feniks kriv je.
Naš Feniks uvdeka kriv je:

Ča smo lane sako malo va Noven liste (za nevoju) bili
i za ono ča nan su i nisu na školskoj zgrade storili.

Ča smo celo pasano leto po celoj Reke beskućnike glumili
i na niš leh, već na pet mest va školu (i delat) hodili!

Kriv je i ča je saki treći školan na gradsku kurijeru šal,
a za školskun (napol praznun)
su učitelji ki put morali i bežat
i ča smo se va kurijere stalno mlatili
da bimo na zadnjih mesteh sedeli,
a niš nan to ni vredilo kad smo va saken zavoje
ionako kod kompiri (od)leteli.
Ča smo va Zamete 'va transporte zgubili' kuliku decu
pa se sad moremo žalet Bogu i svecu
ča več nismo najbrojneja škola va grade,
magar smo provali sakakove monade.

I još kriv je ča su nas profesori z bujola prolevali,
ča smo stalno (a nismo smeli) z aparata hranu krali
i ča su prvašići brižni zamalo bez svojeh marend ostali.

Kriv je i ča su oni va „Tesle“ morali gult s krpun po zide
i potle pituri glumili,
ča nan je policija prišla va 'posjet'
kad smo „jogurt revoluciju“ storili,
ča nas do ekipe na dolnji kat i vanka z škole nisu pušćali,
leh su nas va razred zakračunali.
Kriv je i ča je jedna mala z glavun poneštru razbila,
ča je jedna učiteljica va nesvijesti finila,
ča smo zbog slikanja učitelja pod saton ukor dobili
i ča je za 1. april WC školjku zapalil -
za to je jedino Feniks i niki drugi kriv!

A koda to se ni dosta bilo,
i va novoj zgrade nastavil je po svoju, kako ne rabi -
pa da i to povedemo, da se ne pozabi:

Sada kriv je ča nan daž nutre va škole pada,
ča nan je va „novoj“ škole posakuda vlaga
i ča nan novi zidi sliče na sir na školje.
Ča va dvorane i sakuda po zideh curi
i ča se nikemu se to skupa sanirat ne žuri.
Kriv je ča grijanje ne moremo smanjit ni zapret,
a kad je zaprto, kod ni poneštri, ne da se otpret.
Ča su radijatori tako čvrsti da ih zrušimo čin jih se takne,
a vezano zato - niki ni da makne!

Kriv je i ča nan pregradni zidi glume panoi,
ča nan va engleskon i matematiki smrdi,
ča nan va celoj škole koltrin i bonagracij fali
i ča ni produžni kabel ne moremo nigdere nač kad zarabi.

I još kriv je:
ča nan je „podmetnul“ raskopano tlo z kega cijevi strše,
ča nimamo za hartu, toner, printer
i se druge tekuće stroške,
ča vrata moramo znimat kad nan cijevi puknu
i poplavu store.

Ča nan je okoliš urejen koda j' bomba pala,
ča smo još vavek bez kuhinje i kantina je prazna,
ča knjižnicu ne moremo posložiti kod Bog zapoveda
aš nan štelaži na se bandi fale
i ča napol oslikan zid va holu već dva meseca
čeka „bolje dane“.

Najveć kriv je ča najveća škola v Reke
ni va 21. veke još Interneta nima,
ča smo zadnje školske novine (aš za tiskati ni bilo soldeh) na web stavili
- pa neka ih sam sebe išće i znima - kega zanima,
ča si ki gredu na natjecanja i se slično
najveć samo „frišku figu“ dobe
i ča sako malo neka deca monu od sebe store.

Kriv je ča je tako jedan mali va dvorani pal i nogu zlomil,
drugi neki da je pak, skačuć z krova *Batmana* glumil
(i sav se usput polomil),
neki odbojkaši da na utakmice pali su na rit,
a neki da ni po noven neravnen hodnike
ne znaju spodobno hoditi.

Najzad kriv je ča je i svetoga Mikulu recesija čapala
pa nan je ovo leto prišal bez krampusa i bez šćapa,
ča smo božićnu priredbu bombastično,
s petardami odbavili,
od brižnega soba na pozornice invalida napravili
(kad su mu nogu rastavili).

A nan sen pak ni ocjene na polugodištu
(valjda i to zbog krize)
nisu zaključili ni dali!

Ne daj Bog da smo pak se napisali -
do škura bimo uvde ostali
i o teh nevojah povedali!

Srdoči, februara 2013. leta

Autori:

Antonio Babić, Aneta Barešić, Antonela Čančar, Martina Marku, Mihaela Pleša, Bernarda Sučić

Mentor:

*Nensi Čargonja Košuta, prof. i dipl.bibl.
(šk. knjižničar)*

*Na **Pusni utorak** va holu čitali:
Antonio Babić, Paula Linić, Ivona Mrakovčić*